CBETA電子佛典集成

CBETA Chinese Electronic Tripitaka Collection ebook

T22n1426

摩訶僧祇津大比丘

戒本

東晉佛陀跋陀羅譯

目次

- 編輯說明章節目次

編輯說明

- 本電子書以「CBETA 電子佛典集成 Version 2022.Q4」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 servi ce@cbeta..org 回報。
- <u>版權所有</u>,歡迎自由流通,但禁止營利使用。

No. 1426 [cf. No. 1425] 摩訶僧祇律大比丘戒本

東晉天竺三藏佛陀跋陀羅譯

六念法

「一者,當知日數,月一日、二日,乃至十四日、十五日,月大、 月小悉應知。

「二者,清旦當作施食法:『今日得食施某甲,某甲於我不計意, 我當食。』(如是三說)

「三者,日日自憶若干臘數。

「四者,當憶念受持衣及淨施者。

「五者,當念不別眾食。

「六者,當念病不病。」

摩訶僧祇律波羅提木叉大比丘戒本

「大德僧聽!冬時一月過,少一夜,餘有一夜三月在,老死至近、 佛法欲滅。諸大德!為得道故一心勤精進。所以者何?諸佛一心勤 精進故得阿耨多羅三藐三菩提,何況餘助道法!」

「未受具戒者已出。」

「僧今和合先作何事?」(一人答言:「布薩說戒。」)「諸大德!不來諸比丘說欲及清淨。」「誰與比丘尼取欲?」

「合十指爪堂, 供養釋師子;

我今欲說戒, 僧當一心聽。

乃至小罪中, 心應大怖畏;

有罪一心悔, 後更莫復犯。

心馬馳惡道, 放逸難禁制;

佛說切戒行, 亦如利轡勒。

佛口說教誡, 善者能信受;

是人馬調順, 能破煩惱軍。

若不受教勅, 亦不愛樂戒;

是人馬不調, 沒在煩惱軍。

若人守護戒, 如犛牛愛尾;

繫心不放逸, 亦如猴著鎖。

日夜常精進, 求實智慧故;

是人佛法中, 能得清淨命。」

「大德僧聽!今十五日布薩說波羅提木叉。若僧時到僧忍聽,僧一 心共作布薩說波羅提木叉。如是白。」

「諸大德!今布薩說波羅提木叉,僧一心善聽。有罪者應發露、無罪者默然,默然故當知諸大德清淨。如一一比丘問答,是比丘眾中三唱。若比丘如是比丘眾中三唱,憶有罪應發露,不發露得故妄語罪。諸大德!故妄語罪,佛說障道法,是故比丘欲求清淨故,憶有罪應發露,發露則安隱,不發露罪益深。」

「諸大德!已說波羅提木叉序。今問諸大德!是中清淨不?是中清 淨不?是中清淨不?」

「諸大德!是中清淨,默然故,是事如是持。」

「諸大德!是四波羅夷法,半月半月次說波羅提木叉。

「若比丘,於和合僧中受具足戒,不還戒、戒羸不出、相行婬法乃至共畜生,是比丘波羅夷不共住。

「佛在毘舍離城,成佛五年冬分第五半月十二日,食後東向坐一人半影,為長老耶奢伽蘭陀子制此戒。已制當隨順行,是名隨順法。「若比丘,於聚落中、若空地,不與取隨盜物,王或捉、或殺、或縛、或擯出,『咄男子!汝是賊!汝愚癡。』比丘如是不與取,是比丘波羅夷不共住。

「佛在王舍城,成佛六年冬分第二半月十日,食後東向坐兩人半 影,為瓦師子長老達膩伽,因洴沙王及冀掃衣比丘制此戒。已制當 隨順行,是名隨順法。

「若比丘,自手奪人命,求持刀與殺者,教死、歎死:『咄!人用惡活為?死勝生。』作是意作是想,方便歎譽死快,因是死非餘者,是比丘波羅夷不共住。

「佛在毘舍離城,成佛六年冬分第三半月九日,食前北向坐一人半 影,為眾多看病比丘因鹿杖外道制此戒。已制當隨順行,是名隨順 法。

「若比丘,未知未見,自稱得過人聖法、知見殊勝:『我如是知、如是見。』彼於後時若檢校、若不檢校犯罪,欲求清淨故作是言:『長老!我不知言知、不見言見,虛誑不實語。』除增上慢,是比丘波羅夷不共住。

「佛在舍衛國,成佛六年冬分第四半月十三日,食後東向坐三人半 影,為聚落中眾多比丘及增上慢比丘制此戒。已制當隨順行,是名 隨順法。」

「諸大德!已說四波羅夷法。今問諸大德!是中清淨不?是中清淨不?是中清淨不?」

「諸大德!是中清淨,默然故,是事如是持。」(四事竟)

「諸大德!是十三僧伽婆尸沙法,半月半月次說波羅提木叉。

「若比丘故出精,除夢中,僧伽婆尸沙。

「若比丘, 婬欲變心, 與女人身身相摩觸, 若捉手、若捉髮及餘身分, 摩觸受樂者, 僧伽婆尸沙。

「若比丘,婬欲變心,與女人說作醜惡語,隨順婬欲法,如年少男女,僧伽婆尸沙。

「若比丘, 婬欲變心, 於女人前歎自供養己身: 『姊妹! 如我沙門 持淨戒、行善法、修梵行, 以婬欲法供養第一。』僧伽婆尸沙。 「若比丘, 受使行和合男女, 若娶婦若私通, 乃至須臾, 僧伽婆尸沙。

「若比丘,自乞作房,無主為身,應量作:長十二修伽陀磔手內、 廣七磔手。應將諸比丘示作房處無難處、非妨處。若難處、妨處自 乞作房,無主為身,亦不將諸比丘示作房處,而過量作,僧伽婆尸 沙。

「若比丘,作大房,有主為身,應將諸比丘指授處無難處、非妨 處。若難處、妨處,有主為身,亦不將諸比丘指授處者,僧伽婆尸 沙。

「若比丘, 瞋恨不喜故, 於清淨無罪比丘以無根波羅夷法謗, 欲破彼比丘淨行。此於後時若檢校、若不檢校, 便言: 『是事無根, 我住瞋恨故說。』僧伽婆尸沙。

「若比丘,瞋恨不喜故,於異分中小小事非波羅夷,以波羅夷法 謗,欲壞彼比丘梵行。此於後時若檢校若不檢校,便言:『我以異 分中小小事,住瞋恨故說。』僧伽婆尸沙。

「若比丘,為破和合僧故,勤方便執破僧事故共諍。諸比丘應諫言:『長老!莫為破和合僧故勤方便執破僧事故共諍,當與僧同事。何以故?僧和合歡喜不諍,共一學如水乳合,如法說法照明安樂住。』如是諫時捨者善;若不捨應第二、第三諫,捨是事善;若不捨,僧伽婆尸沙。

「若比丘,同意相助,若一、若二、若眾多,同語、同見欲破和合僧。諸比丘諫時,是同意比丘言:『長老!莫說是比丘好惡事。何以故?是法語比丘、律語比丘,是比丘所說所見欲忍可事,我等亦欲忍可。是比丘知說、非不知說。』諸比丘應諫言:『長老!莫作是語:「是法語比丘、律語比丘。」何以故?此非法語比丘、律語比丘。諸長老!莫助破僧事,當樂助和合僧。何以故?僧和合歡喜不諍,共一學如水乳合,如法說法照明安樂住。』如是諫時捨者善;若不捨應第二、第三諫,捨是事善;若不捨,僧伽婆尸沙。「若比丘,自用戾語,諸比丘共法中如法、如律教時,便自用意言:『長老!汝莫語我好惡事。我亦不語汝好惡事。』諸比丘應諫言:『長老!諸比丘共法中如法、如律教時,汝莫不受,汝亦應如

法、如律教諸比丘。何以故?如來弟子眾展轉相教、展轉相諫,共 罪中出故,善法得增長。』如是諫時捨者善;若不捨應第二、第三 諫,捨是事善;若不捨,僧伽婆尸沙。

「若比丘,依城邑聚落中住,污他家、行惡行,污他家亦見亦聞、行惡行亦見亦聞。諸比丘應諫言:『長老!汝等污他家、行惡行,污他家亦見亦聞、行惡行亦見亦聞。汝等出去,不應此中住。』是比丘言:『僧隨愛、隨瞋、隨怖、隨癡。何以故?有如是同罪比丘,有驅者、有不驅者。』諸比丘應諫言:『長老!如是莫言:「僧隨愛、隨瞋、隨怖、隨癡。有同罪比丘,有驅者、有不驅者。」何以故?僧不隨愛、不隨瞋、不隨怖、不隨癡。長老!汝等污他家、行惡行,污他家亦見亦聞、行惡行亦見亦聞。汝等出去,莫此中住。』如是諫時捨者善;若不捨應第二、第三諫,捨是事善;若不捨,僧伽婆尸沙。」

「諸大德!以說十三僧伽婆尸沙法,九初罪、四乃至三諫。若比丘犯一一罪,隨知覆藏時應與波利婆沙。波利婆沙已,應僧中六日六夜行摩那埵。行摩那埵已,應二十僧中出罪。若少一人不滿二十,是比丘不得出罪,諸比丘應被訶,是事法爾。今問諸大德!是中清淨不?是中清淨不?是中清淨不?」

「諸大德!是中清淨,默然故,是事如是持。」(十三事竟)

「諸大德!是二不定法,半月半月次說波羅提木叉。

「若比丘,與女人獨屏覆處可婬處坐,可信優婆夷於三法中一一如 法說,若波羅夷、若僧伽婆尸沙、若波夜提。比丘自言:『我坐是 處。』於三法中一一如法治,若波羅夷、若僧伽婆尸沙、若波夜 提,應隨可信優婆夷所說法治彼比丘。是初不定法。

「若比丘,與女人獨露現處不可婬處坐,可信優婆夷於二法中一一如法說,若僧伽婆尸沙、若波夜提。比丘自言: 『我坐是處。』於二法中一一如法治,若僧伽婆尸沙、若波夜提,應隨可信優婆夷所說法治彼比丘。是二不定法。」

「諸大德!已說二不定法。今問諸大德!是中清淨不?是中清淨不?是中清淨不?」

「諸大德!是中清淨,默然故,是事如是持。」(二不定竟)

「諸大德!是三十尼薩耆波夜提法,半月半月次說波羅提木叉。

「若比丘,衣竟,迦絺那衣已捨,若得長衣十日畜,若過者,尼薩者波夜提。

「若比丘,衣竟,迦絺那衣已捨,三衣中若離——衣餘處宿,除僧 羯磨,尼薩耆波夜提。

「若比丘,衣竟,迦絺那衣已捨,若得非時衣,比丘若須,應取疾 作衣受。若不足,有望處,為滿故聽一月畜。若過者,足不足,尼 薩耆波夜提。

「若比丘,取非親里比丘尼衣,除貿易,尼薩耆波夜提。

「若比丘,使非親里比丘尼浣故衣,若染若打,尼薩耆波夜提。

「若比丘,從非親里居士、居士婦乞衣,除餘時,尼薩耆波夜提。 餘時者,失衣時。

「若比丘,失衣時,得從非親里居士、居士婦乞衣,若自恣與得取上下衣。若過受,尼薩耆波夜提。

「若居士、居士婦,為比丘辦衣價言:『我辦如是衣價,買如是衣 與某甲比丘。』是比丘先不請,為好故便往勸言:『善哉居士!如 是衣價,買如是色衣與我。』若得衣,尼薩耆波夜提。

「若比丘,居士、居士婦各辦如是衣價言:『我等辦如是衣價,買如是衣與某甲比丘。』是比丘先不請,為好故便往勸言:『善哉居士!各辦如是衣價,共作一如是色衣與我。』若得衣,尼薩耆波夜提。

「為比丘故,若王、大臣遣使送衣直與是比丘,使到言:『如是衣直,若王、大臣送,尊者應受。』比丘言:『我不得受是衣直,送淨衣來者應受。』使言:『尊者有執事人不?』比丘若須衣,應示使若薗民、若優婆塞言:『是人能為比丘執事。』使到勸言:『善哉執事!如是衣價,買如是淨衣與某甲比丘,是比丘來取衣時與。』使勸喻已,還到比丘所言:『尊者所示執事人,我已勸作已,須衣時往取。』比丘若須衣,應到執事所言:『我須衣!我須衣!』第二、第三亦如是說;若得衣者好,若不得應第四、第五、第六在執事人前默然立,得衣者善;若不得,過是求,若得衣,尼薩耆波夜提。若不得,隨衣直來處,若自去、若遣使言:『汝為某甲比丘送衣直,是比丘於汝衣直竟不得用,汝自知莫令失,是事法爾。』(十事)

「若比丘,純黑羺羊毛作新敷具,尼薩耆波夜提。

「若比丘,作新敷具,應用二分純黑羺羊毛、三分白、四分下。若過分,尼薩耆波夜提。

「若比丘,憍奢耶雜純黑羺羊毛作新敷具,尼薩耆波夜提。

「若比丘,作新敷具,應至六年持。若減六年,故敷具若捨若不 捨,作新敷具,除僧羯磨,尼薩耆波夜提。

「若比丘,作新敷具氈尼師壇,應著故敷具氈方一修伽陀磔手,為 壞色故。若不著,作新敷具氈尼師壇,尼薩耆波夜提。

「若比丘,道行得羊毛,若須得取至三由旬。若過者,尼薩耆波夜提。

「若比丘,使非親里比丘尼浣染擘羊毛,尼薩耆波夜提。

「若比丘,自手捉生色似色,若使人捉舉染著者,尼薩耆波夜提。

「若比丘,種種賣買,尼薩耆波夜提。

「若比丘,種種販賣生色似色,尼薩耆波夜提。(二十竟)

「若比丘,長鉢得十日畜。若過者,尼薩耆波夜提。

「若比丘,所用鉢減五綴,更乞新鉢為好故,尼薩耆波夜提。是鉢應眾中捨。眾中最下鉢應與,作是言:『長老!是鉢受持,破乃止。是事法爾。』

「若比丘,病應服酥、油、蜜、石蜜、生酥及脂,一受七日服。若 過七日,有殘不捨而服,尼薩耆波夜提。

「若比丘,與比丘衣已,後瞋恨不喜,若自奪、若使人奪,得衣者, 尼薩耆波夜提。

「若比丘,春殘一月在,當求雨浴衣,半月在當作成受用。若未至 求雨浴衣,作成受用者, 尼薩耆波夜提。

「若比丘,自行乞縷,使非親里織作衣,尼薩耆波夜提。

「若居士、居士婦使織師為比丘織作衣,是比丘先不請,為好故便 往勸織師言:『善哉居士!此衣為我作,汝當好織令緻長廣,當與 汝錢直、若食直。』如是勸,得衣者,尼薩耆波夜提。

「若比丘,十日未至自恣得急施衣,須者得取畜至衣時。若過時 畜,尼薩耆波夜提。

「夏三月未至,夏末月比丘在阿練若處住,有疑恐怖有因緣事,三 衣中若一一衣得寄家內離六宿。若過者,除僧羯磨,尼薩耆波夜 提。

「若比丘,知物向僧自迴向己,尼薩耆波夜提。」(三十事竟)

「諸大德!已說三十尼薩耆波夜提法。今問諸大德!是中清淨不?是中清淨不?是中清淨不?」

「諸大德!是中清淨,默然故,是事如是持。」

「諸大德!是九十二波夜提法,半月半月次說波羅提木叉。

「若比丘,知而故妄語,波夜提。

「若比丘,種類形相語,波夜提。

「若比丘,兩舌語,波夜提。

「若比丘,知僧如法如律滅諍已,更發起言: 『此羯磨不了,當更作。』作是因緣不異,波夜提。

「若比丘,為女人說法過五六語,除有智男子,波夜提。

「若比丘,教未受具戒人說句法,波夜提。

「若比丘,自稱向未受具戒人說得過人法: 『我如是知、如是 見。』說實者,波夜提。

「若比丘,知比丘麁罪,向未受具戒人說,除僧羯磨,波夜提。

「若比丘,僧應分物,先聽與而後遮言:『長老!汝親厚意,迴僧物與人。』波夜提。

「若比丘,僧半月誦波羅提木叉經時,作是言:『長老!用誦是雜碎戒為?使諸比丘生疑悔。』作是輕呵戒因緣不異,波夜提。(十事意)

「若比丘,壞種子破鬼村,波夜提。

「若比丘,異語惱他,波夜提。

「若比丘,嫌責語,波夜提。

「若比丘,僧住處露地敷臥床、坐床褥枕,若自敷、若使人敷,去 時不自舉、不使人舉,波夜提。

「若比丘,僧房內敷床褥,若自敷、若使人敷、去時不自舉、不使 人舉,波夜提。

「若比丘,瞋恨不喜,僧房內牽比丘出、若自牽、若使人牽,下至 言:『汝出去!』波夜提。

「若比丘,知僧房內比丘先敷床褥,後來敷欲擾亂令去,作是因緣 不異,波夜提。

「若比丘,僧房閣屋上敷尖脚床,若坐若臥,波夜提。

「若比丘,知水有蟲,澆草泥、若使人澆,波夜提。

「若比丘,經營作大房,施戶牖,齊再三覆,當於少草地中住教。 若過者,波夜提。(二十竟)

「若比丘,僧不差而教誡比丘尼,波夜提。

「若比丘、僧差教誡比丘尼、從日沒乃至明相未出、波夜提。

「若比丘,往尼住處教誡,不白善比丘,除餘時,波夜提。餘時者,病時。

「若比丘語比丘言:『長老!為食故教誡比丘尼。』波夜提。

「若比丘,共一比丘尼空靜處坐,波夜提。

「若比丘,與比丘尼期共道行,下至聚落間,除疑怖畏估客伴時, 波夜提。

「若比丘,與比丘尼期共載船,上水下水,除直渡,波夜提。

「若比丘,與非親里比丘尼衣,除貿易,波夜提。

「若比丘,與非親里比丘尼作衣,波夜提。

「若比丘,知比丘尼讚歎食,除舊檀越,波夜提。(三十事竟)

「若比丘,施一食處,不病比丘過一食,波夜提。

「若比丘,處處食,除病時、衣時,波夜提。

「若比丘,食已足離坐處,不作殘食法食者,波夜提。

「若比丘,知彼比丘食已足離坐處,不作殘食法,欲惱故勸言:

『長老!食此食。』食者,波夜提。

「若比丘,不與不受著口中,除水及楊枝,波夜提。

「若比丘, 非時食, 波夜提。

「若比丘,停食食,波夜提。

「若比丘,往白衣家自恣與餅麨,得受兩三鉢出外共不病比丘食。 若過受不共食,波夜提。

「若比丘,不病,為身乞酥、油、蜜、石蜜、乳酪、魚、肉,如是 乞美食食者,波夜提。

「若比丘,別眾食,除餘時,波夜提。餘時者,病時、衣時、行時、船上時、大眾會時、外道施食時。(四十事竟)

「若比丘,無病,自為身然草木牛屎,若自然、若使人然,除因緣,波夜提。

「若比丘,與未受具戒人同屋過三宿,波夜提。

「若比丘,與羯磨欲已,後瞋恨不喜作是言:『我不與欲、不好 與,此羯磨不成就,我不與此欲。』波夜提。

「若比丘語比丘言:『長老!共汝入聚落,到彼當與汝食,若自與、若使人與。』後欲驅故便言:『汝去!我共汝住不樂,我獨住樂。』作是因緣不異,波夜提。

「若比丘作是語:『長老!我知世尊說障道法,習此法不能障道。』諸比丘應諫言:『長老!汝莫謗世尊!謗世尊者不善,世尊不作是語。世尊說障道法實障道。汝捨此惡事。』如是諫時,若堅持不捨,應第二、第三諫,捨者善;若不捨,僧應作舉羯磨。是比丘,波夜提。

「若比丘,知比丘惡見不捨,僧如法、如律作舉羯磨。未作如法、 如律,共食、共同屋住,波夜提。

「若沙彌作是言:『如來說婬欲是障道法,我知習婬欲不能障道。』諸比丘應諫言:『汝沙彌莫謗世尊!謗世尊者不善,世尊不作是語。世尊說婬欲實障道法。汝捨此惡見。』如是諫時,若堅持不捨,應第二、第三諫,捨者善;若不捨應驅出,言:『汝從今已後不應言:「佛是我師。」亦不得共比丘三宿。汝去,不得此中住。』若比丘知沙彌惡見不捨驅出,未作如法,誘喚畜養共食、共住,波夜提。

「若比丘,得新衣當三種壞色,若一一壞色青、黑、木蘭。若不壞 色受用者,波夜提。

「若比丘,僧住處內寶、若名寶,若自取、若使人取,除內取為主 來求者與,波夜提。

「若比丘,減半月浴,除餘時,波夜提。餘時者,春後一月半、夏初一月。此二月半,是熱時、病時、風時、雨時、作時、行時。(五

十事竟)

「若比丘,知水有虫飲者,波夜提。

「若比丘,自手與無衣出家男女食,波夜提。

「若比丘,知食家婬處坐,波夜提。

「若比丘,知食家屏處坐,波夜提。

「若比丘,看軍發行,波夜提。

「若比丘,有因緣事得到軍中三宿,若過者,波夜提。

「若比丘,有因緣事得到軍中三宿,若看軍發行牙旗鬪勢,波夜提。

「若比丘,瞋恨不喜打比丘,波夜提。

「若比丘,瞋恨不喜掌刀擬比丘,波夜提。

「若比丘,知比丘麁罪覆藏者,波夜提。(六十事竟)

「若比丘,故奪畜生命,波夜提。

「若比丘,故令他比丘起疑悔須臾不樂,作是因緣不異,波夜提。

「若比丘,淨施五眾衣,後不捨而受用者,波夜提。

「若比丘,戲笑藏比丘衣鉢尼師壇針筒、若使人藏,波夜提。

「若比丘,恐怖比丘,波夜提。

「若比丘,水中戲,波夜提。

「若比丘,以指相指,波夜提。

「若比丘,與女人期共道行,下至聚落中,波夜提。

「若比丘,與女人同屋宿,波夜提。

「若比丘,與女人獨屏處坐,波夜提。(七十事竟)

「若比丘,知人不滿二十,與受具足戒,是人不名受具足。諸比丘 應被呵,波夜提。

「若比丘,知賊眾期共道行,下至聚落中,波夜提。

「若比丘,自手掘地、若使人掘,若指授語: 『掘是地。』波夜 提。

「若比丘,四月別請應受。過受,波夜提。除更請、長請。

「若比丘語比丘言:『長老!當學,莫犯五眾罪。』是比丘言:

『我不隨汝語,若見餘長老寂根多聞、持法深解,我當從諮問,彼 有所說我當受行。』除餘時,波夜提。餘時者,比丘欲得法利應 學,亦應問餘比丘。

「若比丘、飲酒、咽咽波夜提。

「若比丘,輕他比丘,波夜提。

「若比丘,諸比丘諍訟時默然立聽,彼有所說我當憶持,作是因緣 不異,波夜提。

「若比丘,僧斷事不與欲,出去不白,波夜提。

「若比丘,阿蘭若處住,非時入聚落,不白善比丘,除急事,波夜提(八十事竟)

「若比丘同食處,食前、食後不白善比丘,行至餘處,除衣時,波夜提。

「若比丘入王宮,夫人未藏寶,下至過門限,波夜提。

「若比丘,骨牙角作針筒,破已,波夜提。

「若比丘,作床脚應高佛八指,除入梐。若過,截已,波夜提。

「若比丘,兜羅綿紵褥,若坐、若臥,出已,波夜提。

「若比丘,作尼師壇應量作:長二修伽陀磔手、廣一磔手半,更益 一磔手。若過,截已,波夜提。

「若比丘,作覆瘡衣應長四修伽陀磔手、廣二磔手。若過,截已,波夜提。

「若比丘,作雨浴衣應長六修伽陀磔手、廣二磔手半。若過,截已,波夜提。

「若比丘,與如來衣量等作衣。若過,截已,波夜提。如來衣長九修伽陀磔手、廣六磔手。

「若比丘,瞋恨不喜,以無根僧伽婆尸沙法謗,波夜提。

「若比丘,知物向僧迴與餘人,波夜提。

「若比丘,僧半月說波羅提木叉經時,作是言:『長老!我今始知是法入修多羅,半月波羅提木叉中說。』諸比丘知彼比丘本若二、若三,說《波羅提木叉經》中坐,況復多!彼比丘不以不知故無罪。隨所犯罪——如法治,應呵責言:『長老!汝失善利,半月說《波羅提木叉經》時,汝不尊重、不一心念、不攝耳聽法。』呵已,波夜提。」(九十二事竟)

「諸大德!已說九十二波夜提法。今問諸大德!是中清淨不?是中清淨不?是中清淨不?」

「諸大德!是中清淨,默然故,是事如是持。」

「諸大德!是四波羅提提舍尼法,半月半月次說波羅提木叉。

「若比丘,阿練若處住,先不語不病,外不受、於內受,若噉、若 食,應向餘比丘悔過言:『長老!我墮可呵法。此法悔過。』

「若比丘,不病在白衣家內,從非親里比丘尼邊受食,若噉、若食,應向餘比丘悔過言:『長老!我墮可呵法。此法悔過。』

「若比丘,受白衣家請食,比丘尼在前立,指示言:『與是比丘飯,與是比丘羹、若魚、若肉。』諸比丘應語是比丘尼言:『姊妹小住!待諸比丘食竟。』若無一比丘呵者,是諸比丘應向餘比丘悔過言:『長老!我墮可呵法。此法悔過。』

「有學家,僧作學家羯磨,比丘先不請而往自手受食,若噉、若食,是比丘應向餘比丘悔過言:『長老!我墮可呵法。此法悔過。』」

「諸大德!已說四波羅提提舍尼法。今問諸大德!是中清淨不?是中清淨不?是中清淨不?」

「諸大德!是中清淨,默然故,是事如是持。」

「諸大德!是眾學法,半月半月次說波羅提木叉。

- 「齊整著內衣,應當學。
- 「齊整被衣,應當學。
- 「好覆身入家內,應當學。
- 「諦視入家內,應當學。
- 「小聲入家內,應當學。
- 「不笑入家內,應當學。
- 「不覆頭入家內,應當學。
- 「不反抄衣入家內,應當學。
- 「不脚指行入家內,應當學。
- 「不叉腰入家內,應當學。(十事)
- 「不搖身入家內,應當學。
- 「不搖頭入家內,應當學。
- 「不掉臂入家內,應當學。
- 「好覆身家內坐,應當學。
- 「諦視家內坐,應當學。
- 「小聲家內坐,應當學。
- 「不笑家內坐,應當學。
- 「不覆頭家內坐,應當學。
- 「不反抄衣家內坐,應當學。
- 「不抱膝家內坐,應當學。(二十事)
- 「不交脚家內坐,應當學。
- 「不叉腰家內坐,應當學。
- 「不動手足家內坐,應當學。
- 「一心受食,應當學。
- 「羹飯等食,應當學。
- 「不偏刳食,應當學。
- 「不口中頰食食,應當學。
- 「不吐舌食,應當學。
- 「不大團飯食,應當學。
- 「不張口待食,應當學。(三十事)
- 「不挑團食,應當學。
- 「不齧半食,應當學。
- 「不含食語,應當學。
- 「不指抆鉢食,應當學。
- 「不舐手食,應當學。
- 「不[口*束]指食,應當學。
- 「不噂喋作聲食,應當學。
- 「不吸食食,應當學。

- 「不全吞食,應當學。
- 「不落飯食,應當學。(四十事)
- 「不振手食,應當學。
- 「不嫌心看比坐鉢食,應當學。
- 「端心視鉢食,應當學。
- 「不病不得為己索食,應當學。
- 「不以飯覆羹上更望得,應當學。
- 「不以膩手受飯器,應當學。
- 「不以鉢中殘食棄地,應當學。
- 「己立不為坐人說法,除病,應當學。
- 「己坐不為臥人說法,除病,應當學。
- 「己在下不為高床上人說法,除病,應當學。(五十事)
- 「不為著革屣人說法,除病,應當學。
- 「不為著屐人說法,除病,應當學。
- 「不為覆頭人說法,除病,應當學。
- 「不為纏頭人說法,除病,應當學。
- 「不為抱膝蹲人說法,除病,應當學。
- 「不為翹脚人說法,除病,應當學。
- 「不為捉刀人說法,除病,應當學。
- 「不為捉弓箭人說法,除病,應當學。
- 「不為捉杖人說法,除病,應當學。
- 「不為捉蓋人說法,除病,應當學。(六十事)
- 「在後不為在前人說法,除病,應當學。
- 「不為騎乘人說法,除病,應當學。
- 「在道外不為道中人說法,除病,應當學。
- 「不生草上大小便涕唾,除病,應當學。
- 「不水中大小便涕唾,除病,應當學。
- 「不立大小便,除病,應當學。」(眾學六十六事竟)
- 「諸大德!已說眾學法。今問諸大德!是中清淨不?是中清淨不?是中清淨不?」
 - 「諸大德!是中清淨,默然故,是事如是持。」
- 「諸大德!是七滅諍法,半月半月次說波羅提木叉。
- 「若隨事隨順人,應與現前比尼人,與現前比尼。
- 「應與憶念比尼人,與憶念比尼。
- 「應與不癡比尼人,與不癡比尼。
- 「應與自言治比尼人,與自言治比尼。
- 「應與覓罪相比尼人,與覓罪相比尼。
- 「應與多覓罪相比尼人,與多覓罪相比尼。

「應與如草敷地比尼人,與如草敷地比尼。」

「諸大德!已說七滅諍法。今問諸大德!是中清淨不?是中清淨不?是中清淨不?」

「諸大德!是中清淨,默然故,是事如是持。」(七滅諍竟)

諸大德!是隨順法,半月半月次說波羅提木叉。二部比尼隨順者, 隨順行此法。」

「諸大德!已說隨順法。今問諸大德!是中清淨不?是中清淨不?是中清淨不?」

「諸大徳!是中清淨,默然故,是事如是持。」

「諸大德!已說戒經序法已、說四波羅夷法已、說十三僧伽婆尸沙法已、說二不定法已、說三十尼薩耆波夜提法已、說九十二波夜提法已、說四波羅提提舍尼法已、說眾學法已、說七滅諍法已、說法隨順法,是名如來、應供、正遍知法比尼法,入《波羅提木叉經》中,是法隨順法,一切學莫犯。」

「佛言:『毘婆尸佛如來、應供、正遍知,為寂靜僧,略說波羅提木叉:

「『「忍辱第一道, 涅槃佛稱最; 出家惱他人, 不名為沙門。」

「『尸棄佛如來、應供、正遍知,為寂靜僧,略說波羅提木叉:

「『「譬如明眼人, 能避嶮惡道; 世有聰明人, 能遠離諸惡。」

「『毘葉婆佛如來、應供、正遍知,為寂靜僧,略說波羅提木叉:

「『「不惱不說過, 如戒所說行;

飯食知節量, 常樂在閑處;

心淨樂精進, 是名諸佛教。」

「『拘留孫佛如來、應供、正遍知,為寂靜僧,略說波羅提木叉:

「『「譬如蜂採華, 不壞色與香,

但取其味去; 比丘入聚落,

不破壞他事, 不觀作不作,

但自觀身行, 諦視善不善。」

「『拘那含牟尼佛如來、應供、正遍知,為寂靜僧,略說波羅提木叉:

「『「欲得好心莫放逸, 聖人善法當懃學; 若有知寂一心人, 爾乃無復憂愁患。」

「『迦葉佛如來、應供、正遍知,為寂靜僧,略說波羅提木叉:

「『「一切惡莫作, 當具足善法; 自淨其志意, 是則諸佛教。」

「『釋迦牟尼佛如來、應供、正遍知,為寂靜僧,略說波羅提木叉:

「『「護身為善哉! 能護口亦善;

護意為善哉! 護一切亦善。

比丘護一切, 便得離眾苦;

比丘守口意, 身不犯諸惡,

是三業道淨, 得聖所得道。

若人打罵不還報, 於嫌恨人心不恨,

於瞋人中心常淨, 見人為惡自不作。」

七佛為世尊, 能救護世間;

所可說戒經, 我已廣說意。

諸佛及弟子, 恭敬是戒經;

恭敬戒經已, 各各相恭敬。

慚愧得具足, 能得無為道。』」

已說波羅提木叉經竟。僧一心得布**薩**。 摩訶僧祇戒

「持戒淨身口, 攝心正憶念;

多聞生實智, 斯由戒為本。

戒為妙寶藏, 亦為七財寶;

戒為大船師, 能渡生死海。

戒為清涼池, 澡浴諸煩惱;

戒為無畏術, 消伏邪毒害。

戒為究竟伴, 能過嶮惡道;

戒為甘露門, 眾聖之所由。 持戒心不動, 專精不放逸; 不毀正戒相, 亦無邪命心。 是名清淨戒, 諸佛之所讚; 是故歡喜持, 清淨之戒身。」

摩訶僧祇律大比丘戒本

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".